

I 90.

15. Oul, 1576 - April 1577

**Der Rector der Universität an Landhofmeister, Kanzler und
Statthalter des Kaisers.**

Ro. kay. Maj. landhofmaister, cantzler, stathalter unnd regentn. Hochwirdiger furst, erwirdig, wolgeporn, hochgelert, gestreng, edl, vest gnedig herrn: ewr gnad sind bericht der hanndlung, so vor verschiner zeit durch ainen studenntn, der von lernung wegn hieher auff dise hohe schuel khumen ist, beschehen; darumb er von herrn stattrichter gefenniglich angenommen unnd noch halltund ist. Habn wir den selbigen nach laut gemainer universitet furstlicher privilegien als unnsERM gerrichtzwang underworffen ersuecht unnd zue uberantwurtn begert, mit erpiettung, ainem yedn durch in belaidigten zum recht unnd aller pilligkait zue halltn. Aber herr stattrichter, unangesehen solchs empiettn, in bisher uberantwurtn nit welln, sonnder furgebn, er mug solcher freyhait der universitet, die weill er eingeleibt unnd geschribn nit sey, nit betragn noch behelffen. Habn wir im zu versten geben, das ain yeder, der von lernung wegn herkumbt unnd uber ain monat lang (wie dan in disem fall ist) hie oneingeschribn nit bleibt, der selbig sey unnsER jurisdicion unnd gerichtztwang unnderworffen, mug sich auch der privilegn der universitet (ob er gleich eingeschribn nit sey) geprauchn unnd behelffn, nach laut eines furstlichn privilegi, des wir hie inen angetzaigt habn. Hatt er geantwurt: er kun dy privilege der massn nit versten, das er unns gemelltn studentn zue uberanntwurtn schuldig sey. Nachdem aber dise furstlich freyung klar und lawtter ist, nach lawt eines glaubwirdigen ausstzug, den wir ewrn gnadn hiemit underthäniglich furbringen, unnd wenig uns spotlich war, furstlich freyhait zu habn, wo die selbigen hantgehalltn nit wurdn, ist unnsER unnderthänig bitt, ewr gnad welln alls dy obristn beschutzer, beschirmer unnd hanthalter furstlicher freyhait mit herrn stattrichter ernnstlich verschaffen, das er unns obangetzaigt gefanngen nach lawt bestimbter furstlicher freyhait, die er unnd ain yeder zue halltn schuldig ist, on alls vertzieln uberantwurt. Wellen wir mit sonnderen vleiß verfuegn, das an ain yedn belaidigten gnugsam abtrag beschehen soll mitt straff, auch der beganngen tadt. Bevelhen unns hiemit sambt gemainer universitet.

E. G. unndterthänig rector unnd dechant der universitet.